

Brojni mrtvi u bombaškom napadu u Somaliji

8 februar 2012 Izmijenjeno 23:18 CET

Najmanje sedamnaest žrtava u napadu bombaša samoubice izvedenom ispred hotela gdje su se okupili političari



Napad dolazi nakon povlačenja al-Shababa iz Mogadiša [Reuters]

Najmanje sedamnaest ljudi je poginulo u napadu bombaša samoubice koji se automobilom punim eksploziva zabio u kafić pored hotela u somalskoj prijestolnici Mogadišu gdje su odsjeli lokalni političari. „Do sada smo iznijeli devet preminulih civila i 34 ranjenih. Do sada nema žrtava među zakonodavcima. Broj mrtvih možda će porasti“, kazao je policajac Hassan Ali za Reuters.

Napadnuti kafić nalazi se u blizini hotela Muna, koji su u augustu 2010. napali borci al-Shababa. U tom napadu ubijeno je više od 30 ljudi.

Povlačenje al-Shababa

Policija i glasnogovornik trupa Afričke unije u Somaliji kazali su da je napadač prvobitno zapucao na ljude koji su se našli nedaleko od hotela, prije nego što je aktivirao bombe. Iako se al-Shabab povukao iz Mogadiša prošle godine, ova skupina često napada ciljeve vlade koju podržava Zapad.

Reporterka Al Jazeera **Nazanine Moshiri**, koja se javila iz Najrobija u susjednoj Keniji, kazala je da su se napadi desili u vrijeme kada se somalska prijestolnica „pokušava oporaviti nakon povlačenja al-Shababa ... ali napad pokazuje da je al-Shabab u stanju ući u grad i izvesti ovakvu vrstu napada“. Jednodnevna konferencija na kojoj će se raspravljati o nestabilnosti u Somaliji i somalskim piratima bit će održana u Londonu za dvije sedmice.

Izvori: Al Jazeera